

## Ur gelionenn tennet ag ur sailhad dour

Ur pennad kinniget get Patrick DREAN

Kement-mañ a zo degouezhet get pep unan ac'hanomp en e vuhez, moarvat. "C'hoari an Deus" (Doue e latin) a c'heller gober ag an dra-se. Da lâret eo, kavout àr ho hent ur loenig hag a zo edan bout distrujet get lezennoù didruez an natur, ha saveteiñ e vuhez. Da skouer, kouezhet eh eus ur gelionenn en ur sailhad dour, he zenniñ a rit er-maez ha sellet a rit get plijadur doc'h an tammig loen é torchiñ e zivaskell, hag é sec'hiñ a-nebeudigoù. Plijadur e-leizh a ra d'an den an c'hoari-mañ, en arbenn ma ho lak da vout un den mat ha galloudus. Ne goust ket kalz na n'eo ket forzh poanius. Ur skouer arall : pa vez tapet ur c'harv-lann e roued pegus ur gevridenn, en tenniñ ag al las, hag er lakaat da vonet get e hent en-dro. Daoust ha muzuliñ a ra neuze al loenig ar chañs en deus bet ? Nag ar gevridenn, a zo kouezhet he meud e unan ag he eizh dorn ? Amañ e ta splannoc'h ar pezh a zo iskis e c'hoari an Deus. Santiñ a rit mat eh it, evit un herradig, a-enep d'al lezennoù didruez a gomzen anezhe tuchant, al lezennoù-se a lak ar re greñv d'ober berzh, hag ar re wan da vonet da get edan berr.

Neoazh, ma faot deomp gwarantiñ an natur, un natur ha ne vehe ket ur jardrin edan renerezh Mab-Den hag e bennadoù mes un natur dizalc'h, emañ ret deomp asantiñ leuskel ar c'hoari kriz-se d'ober e hent e-mesk an holl spesadoù, àr-bouez ur wezh an amzer, pa c'hoariomp an Deus, peg ur gaouad truez ennomp. Evit leuskel liesseurted ar boudoù bev da vout ar brasañ ar gwellañ, ne c'hellomp ket o gwarantiñ unan hag unan evel tud sot, get hon teknologiezhoù. Ur mod d'ober simploc'h a zo, ha diaesoc'h neoazh da zegemer get meur a unan : leuskel frankiz, ha lec'h, d'an natur. Diaes e vez deomp kabestriñ hon c'hoant da c'hounit tachenn, d'en em astenn, da greskiñ c'hoazh hag arre ! Ha neoazh n'eo ket c'hoazh a-benn arc'hoazh vintin e vo prest Noe da vonet d'ober un tamm tro d'ar blanedenn vMeurzh get e goubladoù loened. Bihan eo an Douar ha bihan e chomo c'hoazh un herrad. Gortoz a raomp marse ne chomehe ag an tigrad nemet mojennoù, skeudennoù hag anvioù kirri-hobregonet Frañs, e-raok dihuniñ hag en em soñjal a-zevri...

Ma... gwelomp tu mat an traoù : posupl a-walc'h n'hon eus ket c'hoazh komprenet razh an traoù, mes komprenet hon eus, da vihanañ, ha gwerso, e oa ret diwall evit ma nend ahe ket reolennoù kriz an natur dizalc'h da vout patrom reolennoù hor c'hevredigezhioù tud. Achu eo gwerso g'an darwinism sokial. Afe... Nemet hag ar c'hontrol e vehe e speredoù tud zo ?